

程

對山集卷之二

五言古詩

予治生乏理遣歲弗調積雨滂溢牆柵畢隕  
曦光不臨潭淖如故板杵未謝傾圯應手雖  
時澤使然而覽事增情懷抱彌惡間有微吟  
旨不稱律當楮長息而已乙夜與兒桌靜居  
歎子長之博遊傷仲宣之遐眺復占一章錄  
付存壁爰釋我憂匪真省玩

季夏百穀否園芳盡枯歇徒憶片雲生依稀逐風沒  
孟秋間復雨翦凌若毫髮豈意八月內淋漓恣長發

漫漫無少衰，冥冥動彌月。牆宇具傾塌，繕治力屢伐。  
萬室如坦途，何嘗羞蹇越。黽勉峙棚箔，隨時亦隨蹶。  
板鋪徒自勞，爾汝分實闕。無情良用繁，循已亦已竭。  
重陰旻天閉，積晦金氣汨。禾稼成暹摧，百口歲馬卒。  
遣運一何蹇，值此大澎渤。龍門不可望，荆楚更寥溼。  
絲竹陳久志，盈虧理應咄。寄言芳薄遊，遙遙使心滑。

至王汝言新第

東下扶風原，緝纒覽春縣。美人岐東子，瀟灑余所羨。  
遊宦三十年，華構久未奠。匍匐城上堂，觀卜已稱善。  
淘塗鮮工力，落成顧遲宴。道逢城市人，聞已聚口眷。  
嗟彼霄漢儔，神變速流電。稽援固有因，壯麗豈無見。  
何當坐君堂，徹旦洽高宴。

寶穡堂作

明農謝昌宦，良覲羨予征。敦義昔所重，况此骨肉情。  
嗣歲節物改，朱陽喜開晴。感今歎伊昔，發車臨廣庭。  
所期德音邁，永修三徑盟。  
平生尚超曠，結廬武亭川。本非青雲姿，竟作金閨愆。  
托交三十載，孤抱亦何淵。邈觀古昔事，彌想梁甫篇。  
感此發深省，誓以俟餘年。

與駱生談玄

陽中蘊陰精其質本柔脆孤修既可疵兼養義尤邃  
我昔讀陰符茲惟有深契接歲逢馬君亦能識涯際  
古書世罕知叅同亦玄閒獨羨平叔言真鼓狂瀾世  
汝欲謝塵氛吾當示其例

寬用昭用昭喪內予與同戚賦此寬之

悽悽意何極悠悠心獨傷共坐草堂下哀痛結中腸  
昔予罹茲戚困拂實相當命數誠有定遭值果誰殃  
歷思古人事足啓昧者行君今復如此我故遠相望  
逝者閔莫返存者且相將幽冥一以隔含思徒自戕  
同用昭自華州南郭往西谿作

愛爾草堂靜驅車同討尋南郊更崎嶇春溪多綠陰  
蒲荇漸將徧松竹已成林感慨宿昔意相對靜塵心  
悠悠日西邁渚禽揚妙音即此與已極何必東山岑

夜發

首夏即煩熱客心欣夜涼美人隔鄉縣音想常見妨  
東發遂西征皓月正流光豈直覽眺適兼滋吟思長  
籃輿去如駛川陸鬱相望惠連有佳句往往播清芳  
顧此棠棣樂邈矣孰能方

洪川柳浦斜眺

烟媚翼曾翳巖陰生暝色柳際斜陽來徘徊望安極

披襟混清風，舉木值嘉息。坐久山月升，情景具相得。  
稽康非養生，謝安有高識。歌嘯振空林，歸跡苦催逼。  
眷言期重來，何必雲間翼。

將往彭麓德充携酒餞之許西

初秋駕言邁，眺彼終南山。忽承草堂宴，復作林山閒。  
盧女奏妙曲，高人浮雲間。尊酒再三舉，戢戢下敦顏。  
敦彼友于志，欲發情復慳。結廬倘成遂，同汝弄潺湲。

示王劉二君

我將入南山，感君苦留酌。對酒念昔人，茲已半淪落。  
日仄歡乍深，道遠身屢作。君有林巒情，共吟雲中洑。

彭麓夜酌

露坐架棚箔，鄰翁高興多。轉觴話農事，絕勝陳綺羅。  
西村二三子，携酒復相過。忽忽至更盡，悠悠柰樂何。

觀禾

我來彭麓下，坐愛青山色。雨過忽新涼，蒼烟望無極。  
秋禾行欲成，豈畏驕陽逼。壟畝綠如屯，原隰少螟蝻。  
同欣有年樂，詎知天子力。

問驛使

汝自馬村來，汪歲定何許。向經袁村西，四顧已如渚。  
河水沒馬腹，奔潦幾時住。愁覩天際雲，癡癡若膏瘡。

白帝司歛藏底事輒垂矩苟無念此人亦當憫禾黍

中夜二首

中夜不能寐攬衣起徬徨出戶仰庭宇但見玄雲翔  
微霧下空闊天道難遽量決旬陸成海百穀良已傷  
我滯滂川役念子鬱相望徘徊不能去慘惻述此章

其二

猗猗厨東楮得雨即成響旅人憂思長感之亦悽愴  
滂水不殺湍積潦百穀漲舉室若楚囚展轉不成况  
賓客雖見臨笑語亦超曠豈無尊俎陳薄言那得放

漏軒

予懷良已惡積漲不可殺復見鳴雨過安能遂予邁  
太息坐漏軒惴惴危堂戒四壁半不存西側已傾壞  
屢霽亦屢作階墀涌溝澮填坎十三宵雲氣胡肯敗  
日日鷄黍陳竟爲故人害款洽豈不惜憂勞欲成瘵  
陽阿奏竒舞羅敷發清噲徒以滋煩愁轉使當軒慨  
戒裝方發值大雨復作

初昏及昧旦已喜得西發倏忽黑雲生滂沛階蘚沒  
平生寡笑言對此何以訥妻孥坐相誚羈滯殆彌月  
仰食市肆間腸胃或已伐予駕亦屢作匯澤可輕越  
太息問白帝幾時滄海竭

詣塗答錢者

歲律既云莫我車方自東苟完兒女事兼眺華山維  
親故握手送徘徊岐路中酌酒爲吾壽慷慨意無窮

悼張之桀三首

粵予遠承訃淒淒來華山哀痛徹五內聞者咸悲酸  
入門見丹旄慘惻何以言但須沸湯嚥氣結鬱難宣  
淚下如縷縻傍人具憂嘆中懼自開釋擲哀尋所安  
幸覩東與郭勉慰千萬端援理肆微論耿耿亦稍寬  
比入見吾女榮榮摧肺肝尚恐極痛斃投淚強爲顏  
愿以後事遠首呼光孝孫逝者莫既返存者宜討論

修短各有數陰隲終在神努力慎飧食庶以迨德門

其二

吾甥蓋人傑篤孝死不渝結廬迨三載哀毀骨立枯  
平生膏梁子飯糗寧所哺雖有親故語華戾非我圖  
畏客強蔬果避名或嘗監凌晨詣墓側號泣五內劓  
三時謹陳饌每陳輒如屠鬼神且爲痛况厥妻與孥  
炎蒸鑠金石流汗被肌膚扇塵且不御詎肯乘舞雩  
感發指欲墮恬然守布麓既以拒姜桂仍復遠洪爐  
積思損榮衛六氣互侵漁沴極神乃去奄忽返虛無

其三

昔愛合歡布上繡雙鴛鴦裁為合歡被拂拭納君床  
 豈意常別離令我涕以滂憂來神思迷恍惚若徃狂  
 星言詣君宅胸臆如刺芒逝者去不返生者徒悲傷  
 生男喜身手生女要柔祥不願千鍾粟願得好夫郎  
 際自結縭後聿遣門楣光豈意忽丁此百憂結我腸  
 衰境庶情歇步履多見妨乃復冒風日匍匐赴汝喪  
 數定物莫改汝志世豈常天荒未為極拭淚述此章

宿渭源里

歲序洎中夏予征當雨餘炎溽既不騁清風時惠如  
 崇崇終南山潺潺豐鄜渠雲霞氣綿幕佳樹蔭交舒

斜日清翠明百志一何攄方啓泐樾想忽至田父居  
 展慰出名酒下榻坐前除徘徊月東出欲罷復趨起  
 浩歌遲明發予乃蒞征車

郭廟答希宋諸公

芳春豈不惜駕言趨華山兒女事如此詎許垂老閒  
 感君遠相餞搦杯淚如潛雖有絲竹奏那能開苦顏  
 握手重猶豫悵望綠草間節物不相待流年逝潺湲  
 欲行復中止臨駕忽心摧澣西花無數予歸當漸開  
 君若有遊思予亦富新醅或擢漳川波或眺汧東臺  
 不取竟月醉昔人安在哉



華州逢郭侍御

元正見西使意君車已東不謂復相語乃在華山墉  
青春節物暢佳遊難屢從讀君驪山詠飄然君子風  
靈寶縣北渡解州遙望餞送諸君子作

春遊過名里覽眺窮幽暱將邁苦匆促振袂惟太息  
執手河梁間徘徊意安極衰年多酒癥緣興輒強食  
節物乖素心親故難屢值因之趣解梁不謂路只咫  
佳辰遺熙陽良晤悲古昔疾舟若轉焱相望忽相失  
行至曲里見杏花

春中渡河陽修忽到曲里滿村開杏花參差亦堪喜

關吏自北來云承呂夫子遣之迎野翁謹愿頗謙禮  
述答俱有章稽援或通理感歎君子居端能化凡鄙  
隔歲慕良覲不謂邇若此芳春解人意夾路疊紅紫  
宿醒方苦人畢覽興彌起

登山

悠悠慕山林鹿猶獵風回風籃輿上仍却浚壑卑亦重  
東睨指王屋西眺揖崆峒伊昔絆王役俯仰愧孤衷  
徒抱茂陵渴未愜天姥逢嗣歲念君子駕言辭汴東  
覬勉涉清渭從容問邛嵩同懷既終鮮予遊無逖從  
凌巔忽三歎佳勝安有窮何當跨鶴去踏却崑崙峯

於條山絕頂下憫解梁

升嶠覩群岫烟雲互明滅直北看解梁但見池水列  
憶當弱冠時茲川已三閱其南望中條蒼翠萬重揭  
徒動登覽懷未遂討探契繫自發函來不謂遽超絕  
河山傷魏咨欽明想堯烈昌代皇化隆遺風尚昭晰  
耕鑿古未渝勤儉今豈輟悠悠興永歎最茲在時哲

解梁書院四首

層峯拱堂宇蒼翠何嶮嶮盈盈青衿子絃誦夜不輟  
斯文今在茲感嘆懷往昔繫予值垂蹙望道日遼絕  
衣冠羞壯遊踈懶愧先烈結交君子徒努力崇明德

變又故身屢輕涵養意忘心切歲序不待人君子慎其節

其二

諸君青雲姿宿志各言尚奮迅良有期優游每中諒  
修禮慎逸居稽古却支宕得師忻折衷導道決趨向  
我來坐茲堂誦習惟覩創始信豪傑人履歷不虛妄  
科條從昔云謙恭見今讓文采雖所珍躬行以為上

其三

近世尚夸毗造詣實終鮮徒以言語微遂謂道昏顯  
推行跬步艱况此繼墳典狂瀾及明興愈覺支粗淺  
徒有析理名竟為粉飾免天錫涇野君特被人文選

篤行遵誠明因時表舒卷吾道果不絕覲此脉如綫

其四

猗猗青衿子勵志各有圖逸志凌天雲麗作驚九區  
或為廟廊器或為章句徒華要實乃畚枝榮幹還枯  
豈若剜雕琢逝為君子儒所需出所養與世作匡扶  
孰穀諦嘉種稟審良株我詩揭堂左百爾慎所趨

贈寒泉中尉

澄瑩絕纖縈一泓瀉千里寒月搖輕波山光徹波底  
魚鱗不敢遊虬龍得猗猗轉盼清素心浥飲滌凡鄙  
平生畏炎蒸見之輒中喜願言保真寂勿以塵氛免

贈石泉中尉

我本山海人宿志愛泉石緊自逢此泉坐嘯忽日夕  
清淨物不縑涵蘊靈所藉發源本天潢引注故澄碧  
泠泠帶紫房浩浩渺今昔靜慮苟中愜逝往益輝燁

慰叔安方伯

吉凶互倚伏達人契微筭天道茫以森撫膺每長歎  
仙郎世懿寶穎妙予所憚玄泉闕靈質行道切悲斷  
况此骨肉恩惋結安可散逝者既難返修短若宵旦  
往讀逍遙篇條然厭紛亂夷曠今始知惟公試稽覈

贈灤江公十首

灤江公巡撫關陝三年矣政通而人和道真而履固不隱謗不易行有仲尼在魯子產相鄭之風焉予自壬午春遇公於長安時予卧疾敝廬公特枉臨握手論心豐豐不倦雖丁陶孟韓何以過也後公訪予於潯西山房適北山楊宗文羨陂王敬夫東谷張用昭有言於予於是數人者同會公於武功行臺公咨詢之餘則賡倡連宵瑋瑰之氣爾雅之作揆之近覩或已鮮矣今年秋公擢南京卿戒行有日公以書別余昔予與公約公東歸當餞公華山之陰聞公行止信宿

而予有子與以婚娶之事因成小詩十首先以寄公十三日與事當畢即擬來日躍馬循驪山而東然後坐希夷之洞嚼河華之雄酌桑落之酒歌白雲之章與公傾倒數日則亦人生之至願也夷嘗讀公之文與詩有風雅之遺思而駟車復在於冬中於是取少華北風隨爽氣南斗避文星為韻苟得之將來斯亦當時之實錄爾輶車戒晨發循此南域握手立斯須徘徊意安極念子有幽思別言心如織昔為同生蘭今為特飛翼人生易悲樂良晤日所恤黃塵暗清渭對殮安可食

嗟嗟君子心遐眺在燕北

昔並少陵騎長眺治夷宮故都多景象近蹟迷往雄  
感慨發孤詠宛若田心悲翁粵惟霸上決已昧天所窮  
自非大雅操詎識平與崇浥泉漱寒碧酌醴揖群公  
志直意不忝巍然丑石子風

關輔比多事欽公公肥自綬養冠蓋往昔弭亂豈今訛  
崇貨狎卑吏飾貌亡志遠規公來屏笑色事至任安危  
素衷物莫浼逸駕古所窺雖有麇求求謗倏動赤舄悲  
所以丈夫行不與况俗隨

逍遙奮孤邁歲幾一愜淵想北眺崆峒津南矚孟諸塊  
麾塵靖疆場撫劍清罔象黔庶丁溢恩牧宰獲嘉賞  
中原久滄瘼西州獨豐穰感歎垂崖心詎俟益州榜  
夷誦南山章令人發森爽

道以無垢尊蹟超誠所貴皇皇廊廟姿世運實經緯  
翩翩翊鴻業皎皎分萬彙嗟自丁卯來海宇日騰沸  
群公徒憫艱虛恢果奚謂薄俗慕驩虞君子念驚賸  
巍巍城邊畧足回萬夫氣

披叢憇軒下撫卷輒中慚笑我伎微薄無能續高駘  
緬思雄詠侈一發連數函咀嚼味逾雋詠歎誠所耽  
贈瑤似劉傳酬德悵廬參清風溘將遠鄙志揆豈堪

那知邂逅際復送旌旆南

公歸止信宿予餞苦淹後耿耿徒憂傷役役定誰咎  
憶昔承明直相企亦已厚公念薄綺紈予質等蒲柳  
雖能慎初服終恐易衰朽樂遊觀五陵氣候稍非舊  
歎息君子陳宵興望南斗

徂歲始炎鬱岩洞共公萃趣若陶公琴興越滁守醉  
旁眺牛頭原橫坐竹林邃微風浹煩襟冲抱迥靈秘  
偶聞林鳥鳴遽動舞雩喟公度比莘父予志豈荷蕢  
喜貺彌笥來欲和復中避 曾同羨陂飲太微洞中

悠悠長安道車騎紛如雲父老泣相謂童穉聲歛吞

借問道傍士迷谷甚慙慙三秦失慈母黔首懷使君  
餞送順心意昊天安肯聞徘徊玩此語感慨異前云  
不覩澤門誦馬契章甫文

予懷繫莫即公訓安可聆矢詩雖不多聊以宣德馨  
高駕既難挽孤忠益屏營北風嗣玄序節物改仙真  
追送理應及鬱陶浩豈平華山有崎嶇髮髯出青冥  
煩公待予至同訪少微星

飲酒二首

獨居意靡暢行吟心更傷晨發望原際佳氣鬱相望  
恨無同懷人躍馬陟墩岡徘徊日忽暮感嘆琴屢張

山妻出美酒斟酌為君嘗三觴起孤抱百憂忽若忘  
丈夫生世間磊落斯所臧何須文鬱鬱自如陌上桑

其二

猗猗陌上桑托根在沃野蕃枝接崇崖布葉蔭溽夏  
雖無摩雲姿亦可駐車馬婆娑姿衢道側凝望頗瀟灑  
秋來樵採頻踈枝不盈把自擬經春和發榮且修雅  
斬伐及根株萌芽亦已寡君子慎心意紛紛為誰者

東原晚歸

斜陽下平林予駕及巖嶂落花夾路飛蒼流復蕩漾  
孤往多曠情逖覽起高唱入城生暝色登堂尚微亮

兒童喜我歸逍遙壽家釀

卷翠樓聽歌

積翠翼雉堦微風乘小樓嘉賓具來止群伎復能謳  
開窓下瑤瑟接迥遞鶯喉既愜莫春賞仍遂梓里求  
調絕聽自異聲布人詎侔何必廣陵散始知盧莫愁

答德充

吾弟江海士夷居多素心焚香稽往牒操翰播瓊音  
結廬武亭北四圍花柳深坐嘯百志寂世慮安可侵  
老我日相過細歌梁甫吟

臨潼逢孟舉人

遇客臨潼道云是望之姪文采已驚人談論多古昔  
握手不能去斜陽空竚立

長安病瘍荅郭侍御

長安苦蒸熱客遊多倦心攝養一違理乖沴隨見侵  
雖喜藥物具尚多憂否尋愁懃感君意抱苦徒悲吟  
明發定西邁唯君遺德音

白石樓

我聞白石樓乃在太行下丹梯凌紫霄朱甍接巖罅  
盤鬱橫汾曲崔巍紫金叉斜煙蕩洄涵朝暉耀詹房  
兩溪互縈帶千峯隨晦冥嶂屏萬翠列花柳四時明

平生喜遊眺詎可如孫登春中過函谷遂有渤澥行  
徒懷南莊老安能愜初盟人事苦促迫三日滯虞鄉  
雖有泛舟趣却無曾點狂回想王官谷新詩滿素墻  
不識仲南姓徒懷詩思長便思與握手於時共徜徉  
同遊誦其名知是南莊子故家有若人私爲李公喜  
翱翔翰墨場倏忽逾四紀不謂英俊姿尚在秦晉里  
何當登此樓醉汝賢橋梓三嘆發朝邑彌月興猶起  
感君寄書至展轉愛君才欲見不可得空望白雲隈  
吾有雙黃鶴飛飛自天來因逢王子晉借之遊蓬萊  
一去竟千載寥寥猶未迴迴時坐鶴背挈子臨高臺



先過崑崙頂後矐弱水涯徐訪紫華君持其雙玉芝  
吾意竟不歇君心幸勿改寄君白石吟惟君為予待

送呂幼通入京師

幼通終喪北上以乃伯兄九川子之義訪予許  
西別業器重識遠予切愛之方今之士所貴在  
識而所難在器識則往無遺履器則守不易操  
此二者雖伊說旦爽未可後也予昔占仕蓋嘗  
以此睹望當世君子矣顧每有遺恨未嘗不嘆  
古道之罕臻而士行之不遂也是日中秋已邁  
光魄尚圓因與坐遲月升傍午而罷情極興飛

忽漫賦此詞調雖賤感慨具焉所冀幼通益重  
且遠以為吾關中之光而已夫識本於學才由  
諸量又吾幼通之所宜念也

明月何皎皎團圓照中堂感君遠相過影影共壺觴  
斟酌忽亭午此意難遽忘贈君太山什投君雙玉珩  
豈但結情好還欲振微行盛年不常駐嘉木不重芳  
節物互推易奄忽成老蒼予齒日以邁君途日以長  
握手對明月心爽神飛揚願君慎明德慰我以休光

飲酒

枯陽歷春夏萬木具摧折禾稼不成植疑是雷雨竭

黎庶悉奔走忍作故鄉別爺孃鎖空房妻子中道絕  
哭聲動九天僵仆滿前轍官吏約束衰處處憂草竊  
斗粟多見奪憑陵况閱閱七月得時雨誼和萬口悅  
匍匐耘晚田寧知畏炎熱方誇底事佳遽信浚澤輟  
迤及八月初天聽忽畢徹霖霖既雨騰天喬各挺節  
乘閏播來牟舉世相据拮生意雖可觀尚恐恒陽譎  
九月始滂沛劃與煩憂訣道路問訟聲問閭回氣色  
把酒坐華門野叟共行列自謂轉溝壑寧知有鋪錢  
大酌條三斗野歌亦再闋食哉古帝欽稼穡哲后說  
保茲竢災沴有位慎貪贖

整藉

三年困人事何曾理書帙烏鼠白晝遊入門忽首疾  
架閣具傾覆點檢切中沐凌晨趣灑掃整頓條終日  
種類既品題編簡復齊一不但几案清幸靡萬一失  
焚香坐望餘儼然成靜室平生風雅情殊以幸蹇室  
追惟感歎生端坐還羞慙何如谿上翁翩翩獨閒逸

正月二日謁唐山瑩作

逖德行千祀恢猷歷無疆世抱既觸索嗣履益貞昌  
歲序條已改皇運正隆康結茅遠城市眺景陟瞰岡  
微吟苟云可博賞寧見妨野鳥赴幽壑歸馬履夷莊

固陋分茲逐齷齪愧高翔心靜百物冗事邁一瞬長  
冲澹苟成性玼珣隨彼狂兄弟喜咸至祖考儼如望  
昭族豈高爵緒業視攸行默虞倘未別亮往安可傷  
謁長寧先墓和德充

陟言詣東麓俛首念先流驅車各組麗蒙佑獨光休  
本物仗神祖循派緣彼周耀朱有前烈照丹無後侔  
春陽何忽鬱同爾爲遠雝世情薄敦穆古道獨清修  
努力期令德瑰迹賴長籌

植樹

此日春氣和萬木具含秀况我山林居園列頗成就

客自盤屋來驅車扣圭竇白楊二百株緋纒載其後  
根繁生意多幹潤理宜茂倩人速植之行列未差謬  
雖愜靜者心尚祈后土祐澆灌分所勤盤踞晚應覲  
結廬謝王役懷愚負時謬糊口聊秉耕舒形得佳岫  
即非松菊場已還榆柳舊但資歌嘯心絕勝笙竽奏  
望拜掃者效宣城

此日出南郊極目丘墳滿楮錢相間飛哭聲天際斷  
重淵日淪迷笑言難更返生者徒悲心安知亡者但  
同諸公過許西

春陽婉以和佳遊得名里柳絲嫋嫋柔重山夾明水

嘯歌夜未休況與衆君子芳園百卉熙仙姬繁音起  
感歎少年場坐令佳興已行年同逝波心事比苦李  
徒使觀者憂安知居者喜來日苟不多行樂自今始

送袁解夫還整屋

吾愛袁解夫影影古狂客勁風凌千人高情叶金石  
雖為群小排豈繫丈夫厄自古浮天雲馬能蔽白日  
酌酒發浩歌憑君永今夕

九日許西集

并駕得茲曲微聲未良宴賞心眺高陸馳情撫吟卷  
會以天親集酌以懽悰徧俱希具醉歸不惜明蟾賤

於許西贈別明叔三首

三月詣茲曲八月今始復結轡送君歸投壺泛醪醑  
風清懷抱優暑退涼氣淑我歌苦不長聊以詠幽獨  
荒徑殘草多空堂蛛網覆豈無灑掃資紛糾在塵俗

其二

時日得君來開豁極心目夜坐對明月清談倒筐腹  
方礙千日歡詎忍後期促餞子卓午天徘徊日西沒  
眷戀勿復言去去保餘馥

其三

詩人古不易流靡及茲俗片言務剽竊侃侃遂驕足

還耕十三載安能恆吾欲覽子中秋篇翩然接華轂  
大雅當在茲斯文有歸宿麗藻雖可珍雄渾又未復  
願言泝其源開彼漢魏毒

步過許西與諸弟宴作

夕客亟歸思還山餘斜陽却訪遲明發徒步過南莊  
林木既葱蒨花卉復芬芳天親具來止高宴列中堂  
悠悠動絲竹秩秩捧瑤觴風和萬物暢旨酒如可嘗  
東海有仙丘可聞不可望但願及時日骨肉自相將  
吟水向清冷弄月下榆桑一醉杳然卧始知行樂長

許西遊覽

堂厦具傾圯我來心惘然因木亂蒼葭澗花紛開妍  
掃徑坐庭下感昔意彌煎童僕鮮工力修滌竟誰焉  
把酒獨成醉因之歌此篇

懷所約

諸公奕代豪有約過蓬華黑雲東北來雷雨一何疾  
不憂垣半塌惟憂道中空惆望復猶豫意劇難盡述  
緬懷昔人遊寥寥那可匹

與孟獨承之飲世爵堂

佳氣翊良會秩秩欽禮成絲竹動四座妖豔集重楹  
舉觴對明月雙壘為君傾諸君英邁士逸曠負高情

落拓辭世後遠慕壺丘名今日忽相遇詎如瑤與瓊  
相遇不相樂年歲汨以征醉者且莫去歌者請重賡  
試舉一杯酒詎能陪賀卿

再宴世爵堂

服食鍊金洵效遠難遽成夾輔謚皇運時命或相停  
因揖謝人世閉戶理園榮苟遂偃息願詎勝逸豫情  
芳春列萬寶淑陽啓朱明諸君惠然至今予感嘸生  
雖微蒲城美桑落常滿巵斟酌盡消滴嘯歌西日傾  
逝水無返期壯夫慙令名但願樂相樂九鼎咸所輕  
對山草堂宴張太微胡蒙溪徐洞仙諸君子

作

好花不重榮嘉節已瀕夏但能恒對花何計冗與暇  
美酒鬱金香麗曲杜韋娘投汝雙車轄飲我三足觥  
醉舞臨芳樹白日徘徊莫不珍金谷吟特羨南山步  
雲霞映碧池疑是武陵谿掀髯一長嘯花外亂鶯啼

汧東眺望

層崖若長函靈異特中秘迴合上汧岐噴薄下臨渭  
泝沃草木榮氣滋苔蘚翠蒼煙縈紫房白鷺眠芳遂  
木杪見南山翠嶽若天墜時復生白雲觀之使心忤  
山居三十年筋力半銷瘁徒羨古人遊孰契來日事

所以慕良覲冀欲畢微志喚妓理瑤瑟呼童捧兕觥  
感歎發浩蕩悠悠起吟思後會如可諧謂續城南例

登崑翠樓眺望川原

我登崑翠樓川原鬱迴合方喜風霧開倏見煙雲匝  
直東看黃山三秦如堵園興亡理堪惜念之凋朱顏  
同把一尊酒勸君爲君壽莫負當春遊人生若芻狗

經漆村覽有郃古蹟

我聞昔人言此即漢漆縣其東故有郃草木殊葱蒨  
終南當面朝清渭過如練直北倚黃山逶迤控周甸  
前望松檜場知是何王殿王蹟日以微氣色或隱見

西南慶善宮鬱當漆村四勝地遷變多往躅審彌眩  
繫自虞夏來百祥具茲天地靈昔所庇諦此竊中羨

過慶善宮

長川直南瀉清渭橫其衝灑光觸雲漢比下潛真龍  
欽想還譙賦緬懷天口谷地秘非天發安能爲人鍾  
改寺報慈德謹護列崇補淪沒幾百載所遺惟巨鍾  
後當景泰未移置薦福累千牛不可載百室或啓凶  
嗟此亦神物似與守靈蹤蹟滅不能見大約聞老農  
但與看氣色巍巍冠秦雍

渭河泛舟

及渭口將午遙見終南峯挂帆若流電颯颯聞風松  
別茲已三載逸思如酒醲倘遇山中人願言襲高蹤

彭麓山房宴作

南原雙白楊直上數千尺彷彿齊彭山不為后土搯  
山房當其陰瀟灑殊曩昔置酒勸君飲慷慨盡三石  
歲月不肯留人生豈常適試問華岡子誰見王維宅

仙遊潭同蒙溪作

我愛此潭水澄徹涵影虛往在正德莫始與楊子經  
于時雨初霽如列蒼翠京既借隱逸侶復有絲竹聆  
或坐潭心石或浥前上冷白雲半崖出竒觀空八溟

野叟投濁醪何嘗杯少停一聽激激響身醉意靡醒  
至今在心意矢將營小亭今辰同之來芳思浩難局  
共眺發孤詠嗟彼塔陰銘

許西觀田

積歲鮮收穫麥豆今靡望服耕謝人羣托此為口養  
村翁咲賀予喜極復感愴去秋禾未登餓芋溢衢巷  
徒致聖主憂詎及饑餒行米價騰涌亟富民益橫放  
親弟且見逐肯容間里傍須傳整屋糴新年三斗直  
皇穹不絕人從此可飽食慙慙謝村翁相顧三嘆息  
胡不東稽顙此是天子力



觀刈麥

我從華山歸刈麥已大半自長安迤東實美如火炭  
緊我返耕來此麥纔再見接歲禾不登寶玉咸所賤  
周人重農食特分田畷職公私積蓄繁詎有旱乾棘  
春首餓芋多朝廷甚憂恤今日得佳物守護須謹飾  
黃金殪米下其語殊讜直作詩告有位國寶在稼穡

習甥方還

舅為支謾人何可望汝似汝長為汝婚欲保汝祖嗣  
讀書不努力旦暮沉酒醉腸胃一以傷勿生意且凋悴  
令人挈汝歸恐為李君累蝨斯知天時汝豈灰槁類

病加於小愈汝尚諦茲義刈場聞汝來喜極心復惴

自五月朔來偶疾脾肺兩月弗瘳間值栗喪悲

痛呻吟閉戶太息而已七月之望偶携舍弟與

惠逸人過許西則韓藍田周整丞同轡見訪因

成小詩以志予抱兼示諸子

積痛無曠襟殊然殫遙思徒抱豪放恣竟累兒女事  
造物苦戲人皇穹降乖崇卧病動彌月薰心恒似寐  
初秋歇炎蒸藍輿歷幽邃強顏發短歌撫膺泣雙淚  
感君來問予咲我之遠致太息苟自裁引領忽成醉

丁亥春與王孟桑三君子同德克宴集

夜坐秉燭飲道遙如阮公我本江海客憐子有長風  
醉後卧聽曲逸興浩無窮明餐我西邁何時還見同

贈唐明府二首

悠悠子行邁惻惻勞我思敦義稽古昔從容辱微辭  
四境已絃誦庶彙何歲莠非君揭高義顧予豈鍾期  
咲言忽五禩睽別長此基握手暫言駐君子慎其儀

其二

客行謹程限握手茲繁憂相對不與九午語盡意難周  
徒勤方寸懷安能久遲留君才過此謝巖廊須見收  
良驥不留景至珍當別酬好為報明公主令世識大猷

寄題鳳翔養蒙館

養蒙館者前守竇君之所建也初竇君治館成  
徵秀才馮昇主其館教踰年而竇君去今守魯  
君至愈大興復增其室廬益以廩餼所選子弟  
並復優蠲其後專心力學予聞而羨之因賦詩  
寄懸於堂以識兩君之雅政將來君子未必無  
感于斯文居於斯者將誰為而不思所自為哉  
予以是欲馮生重自黽焉爾

鳳翔多名守髫年予已聞迨及正德末猝變如秋雲  
詎能事文教徒以樹私勛遂令往昔義枵枵徒虛器

馮生英俊才學古有幽致向予談始末歷歷匪私媚  
 兩君循良人締建豈無意端本道乃宏發蒙息紛戾  
 于焉亟功力冀以將其實嘉穀蕪良田培養係所值  
 雨暘苟及時勃然稱寶穡我詩雖不長聊將寄所將  
 食德而飲澤後賢慎勿忘

雷雨

雷雨一何厲達旦響未息屋漏注如淙階除忽淪匿  
 三伏膏澤稀赤日苦我稽方抱丘壑憂遽辱天地力  
 大田具沾足枚旃咸挺直喜極登高望畝畝相匝逼  
 既覩大勢成且無蝗螭蝕歸來酌酒歌遠近動喜色

却憶去年事悠悠感胸臆

十月十日

此日是兒生今年兒已死往時具酒筵歡慶羨閭里  
 素帷當中庭凄風蕩旌軹我三次倏若推兒音恍在耳  
 彷彿六旬人何意復丁此莊生逍遙篇亦具死生理  
 哀哉橋梓心千古詎能毀含三踊卧茅茨不知晝移晷

老至

老至見子死心緒已增聒况改骨肉親有忿宜暫撥  
 後事誠杳茫今計合宏闊我古愛行且衰君怒立涌沫  
 詎不矜困魚亦湏憫勞獮外君皆路人又誰肯憐豁

五月二十二日臬死踰旬僮子以其所爲詩三卷及雜集回文稿呈覽悲悼之餘令之繕刊成帙用寄羨陂先生爲臬較定將圖入梓漫成二詩以寫予懷

生兒望長成兒長吾已老自謂百事足詎知天橫早  
兒童搜故書頗獲見遺稿文思顧歲幾曲折未探討  
豈羨長吉名仍並酈炎好造物忌壞竒成性返靈灑  
一讀既一悲千讀則千懊倘儼十年齡尚齊聖於造  
玄理杳莫測吾欲問穹昊

其二

完氣甚宏達少有丈夫容博識物豈眩逸思若風從  
俯仰鮮中詘奮迅有孤蹤苟能假天命鬱爲今詞宗  
顧我忝明德神理奪所鍾英物且凋喪况云痴與庸  
豈無子夏戚尚虞用昭凶緒餘今似君煩將附秦雍

喜雨

去年百穀死餓莩蔽原野幸此薺麥成粗可得瀟灑  
今秋穀又傷蟲蝗望如頽頃自六月終天高雨不下  
人抱立壑悲祀禮徧方社何事枯槁憂歷歲不吾捨  
雨脚從西來奔轟不停瀉萬畝具沾足枝旛轉清雅  
稽首走村翁報賽希後竣縣官不須農鎡銖事樵擯

寄言有位人豈無素心者哀此荼毒餘民志異犬馬

寄王公爵

子本江海人清風冠今昔揮鞭遊宛洛揚帆窺楚澤  
念予山林居慷慨意不索遺我南華篇詎羨竟尺璧  
何時重握手共坐君山石

寄胡承之

我持桑落酒逢君黃山傍黃山有佳氣東逐海雲翔  
抱竒不可售不如縱壺觴窮通細夫事安可訾老莊

行年

行年五十五百憂咸見臨堯舜負盛德子孫誰在矣

縱酒謝時輩要知君子心人生行樂爾何得使愁侵

寄太微

太微神仙人佳思逐雲上揮洒乾坤珍飄飄出塵鞅  
遊宦建章宮才名藉方仰萋菲及南山閉門却交往  
我東遊華峯每過時臨訪靡塵話羲皇拂劍悲魍魎  
或詣少微原歌嘯歷蒼莽倚坐看雲生策杖聽泉響  
遐矚遠不隔幽抱近彌想以茲酬宿心晨夕共歡賞  
別來忽五月予衰殊非衰百憂結我腸許過約恒爽  
夢寐時見之太息誚欺罔新霽起微涼何不謝紛攘

示孫逸人

昔遇王子喬謂君有仙骨遨遊三島中萬里一超忽  
朝餐石門霞莫吸海陵月朱顏滄瑤輝長樂安可歇  
天上降玄鶴白日昇玉闕懶答麻姑書况肯事干謁  
我雖不適意逢君欲飛越

郿塘初浴

憶昔己卯春曾與涇野仙因訪岐東君於茲共行樂  
登山矚岐雍臨池事澡淪于時多雜人穢氣遠相搏  
微憇古祠下魂魄若銷鑠斜陽且啣山亟去步未却  
黽勉宿橫渠是意竟荒蕪棄置至壬午來自郿東郭  
賴有王李曹先驅爲克拓泉水煖且瑩一湯百疴掠

始信靈物佳翻嫌表章卑公今此復臨池神思益恢擴  
瑩徹一如昔清淨宛非昨形暢意轉新神適喜如躍  
羞哉華清宮安能與之若作詩告後來此地不可薄

再浴

凌晨復臨泉浹旦滌豈自心玄靈理難測爽邃屢堪即  
仙源自鴻濛那許后土餽若蕩漾含炎精涵洄印天色  
游泳愜性情修飾鮮工力尚計輪夏粗稍具十夫食

三浴

轉浴心轉清愈至神愈暢日新感湯銘超徃想陸倡  
經疏世共傳截日理須安山木樵采繁若蔚猶可望

始信溫山松常茂語非誣出浴百脉和醺然若酣狀  
擁帳卧小床允在羲皇上信宿欲東還何以慰惆悵

混塘

混塘浴者多相比如鱗次一下數十人待徒踵相至  
痿痺具返初勞悴或靡利塘水如沸湯故能開孔遂  
病果本風濕汗已祥乃羣氣血若羸虛重竭可立斃  
此塘不畏實迎虛便成祟世人喜傳訛其言殊曖昧  
揭榜塘東亭宜自諗其類

和六甥石室納涼二首

乘鶴遊弱水媿予乏仙骨策杖凌崑崙却恐中道蹶

夜夢九華君邀予至具闕子非塵鞅徒有志胡不竭  
日抱炎蒸憂歲月去如突大還可服食聞子已綜核  
果能愜素心長往孰能闕覺來遊西巖洞室亦清越  
方切恚幽獨得君玩新月

其二

老境百慮息所好在山林况此洞室閔塵氛安可侵  
開簾見芳碧迤邐聞鳴禽因之感宿好笑歌梁甫吟  
丈夫志四海何人識此心所以夷與惠曠世懷高襟  
日夕涼風發逸興拂西岑沽酒共斟酌慚無絲竹音  
掃石卧煙霧聽子廣陵琴

中塘

中塘對龍祠昏墊苦不久其水勝別塘祛疾若反手  
池靈人湯多逼仄空襄首安得告有官爲人復尋剖  
覆苦堅彼壩並立成三藪分別男女塘存此奉官守  
庶幾嫌微間分限不紛糾迤南數小池泉出如沸燠  
更能已惡疾惟慮陶瀉後造化播神物與民殄殃咎  
粗因裁成力便見敷衍厚魯公循吏姿顧此亦何有  
倘辱采此辭吾如飲醇酒

石室漫興示六甥

鍊藥坐巖下蟬鳴已驚秋鄭公倡神勺後世焉能儔  
我昔逢方平授訣至三洲始笑鄙俗事期君恣冥搜  
長嘯還五嶽落落那可求

觀谷西石

世徒愛迂談談鬼不知誣謬擬潭上石山靈鎮訶護  
動推一夫開盤踞萬人斲茫茫天宇間此類那能數  
因思乙酉秋沮園爲蛟覆百畝若反掌哀彼采綿婦  
幽壑沂窮谷恠氣日馳鶩豈應溢川時或爲戲蛟厝  
接踵名袖功其語殊牴牾石前頗輕削石後甚凝佇  
倚著原不多動止亦可悟作詩示後賢彷彿得其故  
流俗如遊波安能悉開諭



巖坂小酌

宿志愛山水竭來尋澗源旭日照蒼翠恍惚遊石門  
激濤齧怒石終日聞雷誼策杖坐巖坂芳草如錦墩  
長嘯震天宇小酌興彌煩醉酣聽樵唱悠悠不可言

贈羅員外

子從京國來坐我白雲舍手出華嶽篇不在王楊下  
展讀三四過美如啖甘蔗磊落數語間知君胸次大  
呼僮饌雕胡桑落滿卮瀉握手笑謂君我非武陵人  
但許樂相樂富貴如浮雲今日醉我酒明日送君去  
後會若可期但覓白榆樹

贈任主事少海

山居二十年未見蓬萊客私莫邂逅君文彩甚彪赫  
因讀治安策所擬脗不隔西遊遇中道探囊出素冊  
瓊瑰射人目殊會香今昔再拜覩宸章炳燦照光宅  
歎君英妙時丁此滂沛澤宛如聞都俞依稀見傳說  
握手私謂君丈夫志已獲尚宜踐所陳與世爲表格

尹之先畫竹

虛堂挂翠筠玉濤滿壁起知君徹骨清志意特欣此  
興劇須我題予好亦若爾回視桃李姿穠芳胡足齒  
長安別熊侍御子修

我東遊華山逢子長安陌喜見楊柳青共坐寒芳碧  
桑落出名家斟酌杳今昔道合蔑二難情親欲千石  
夕煙生遠林前旌指咸壁握手難久留知君有佳適  
明年報

天子再赴仙掌席

臨潼滯雨荅郭櫝

我自華山歸滯雨臨潼縣於時苦旱乾黃塵翳人面  
對之心洒然渾如據高譙郭生名家子仕官在秦甸  
知我好文墨遂出吳興卷懇切乞予書欲為後人傳  
今日佳興生題詠看俱遍把筆揮此歌不知日西安

送尹貞外之先

昔逢華陽君云為五帝使檢籙下九州為予泄玄秘  
指點峨嵋傍謂有仙人氣仙人尹之先卓犖萬夫賢  
吐氣成五色為世鼓朱絃絕調人莫知徒見春江篇  
予亦遁世者聞之心灑然恨不遂一見相與定艸玄  
天風自楚下吹落岐周前相見即相信今昔誠罕焉  
款洽苦不久俄赴  
天子宣錢酒華門下逸興浩難傳

夢中麓子

積雨晦臯陸我車不可前排徊望北墅逸運橫雲煙

退坐草堂下籬菊燥且妍節物忽將改引杯吟太玄  
 微醉體亦倦憂謁九華天仙人中薜子揖予出素編  
 云是廣成撰孰能叩其筌憶昔魏伯陽謂我骨當仙  
 苦逐世人好落魄武亭川綠業殆將泯數命或有然  
 始思飲刀圭却老覓長年語既執我手歡笑極周旋  
 振袖出兩藥光如朝日鮮滫彼松下露同吞各一圓  
 五內倏清爽神采非昔焉我居太白下君廬太山巔  
 采芝拾瑤草食玉茹井蓮欲會但瞬息跨鶴何翩翩  
 赤松作參伍玉女侍儿筵悠然萬物表世網安可牽

聞涇野先生轉祭酒

皇明第八葉篤生堯舜君恭默啓元化臣鄰若龍雲  
 辟雍宋季後寥寥無所聞帝監獨旁徹乃及涇野賓  
 彝倫煥朝日奎壁懸至文作人貴身率舉世徒紛紜  
 蘇湖悉口耳安得望高芬得報喜如躍此官惟爾真  
 遙遙千載後重聞歌放勳

對山集卷之二終

程